


TSHILUBA - "Who will deliver me?"

## WANSUNGILA NGANYI ?

Lumingu lukuabo nakadi nyisha Lumu Lumpe mu musoko wa mfumu mukuabo mu buloba bua Lessouto. Kuakadi musumba munene wa bantu, mfumu wa musoko ne mukaji wandi kabidi bakadisangisha netu bua kumvua Diyi dia Nzambi. Diyi dia Muoyo didi ne bukole ne dipite muele wa nseke ibidi kutua, diakabuela mu mitshima ya bakadi banteleje.

Panakadi nyisha kabidi, mukaji wa Mukelenge Munene, Muadi Mukulu, wakabangila kudila bikole. Binsonji biakapueka pa matama andi, wakabika? Wakela diyi bikole ne, "Wansungila nganyi? Nkuatshishe biwasua, mutshima wanyi udi usama bikole, ndi muena dikenga ne muena dikasa dibi!

### WANSUNGILA NGANYI?



*"Yeye utu wenza bibi udi wa diabolo"* (I Yone 3:8).

Nganyi udi mua kunkuatshisha? Nganyi udi mua kunsungila ku bupika ebuka bukole bua bubi? Ndi mua kuenza tshinyi? Nuenu buonso nudi bamanye. Ndi mukaji wa Mfumu ne ndi kabidi umue wa mu bakaji batu bantendelela. Nakuya mu nzubu wa Nzambi bidimu makumi

abidi ne pa mutu, kadi bintu ebi bionso kabiena binkua-tshisha to; kabiena mua kumpesha budishikaminyi nansha; ndi musuika kudi bubu. Ndi munu wa maluvu ne mushipiangananyi. Bianza bianyi bidi bibi ne bikale ne manyanu, bualu bua ntu ngenza nabi maluvu tshinuibua tshitu tshikandibue! Bubi buakasuika bianza ne makasa; ndi muena buloko bua ngena.”

Wakudila kabidi bikole, kunyima wakusomba ne kuelaye diyi bikole ne, “Nkuatshishe, nkuatshishe! Wansungila nganyi? Nganyi udi mua kunsulula ku nshinga eyi ya bubu? Ndi munange Nzambi, Kadi bubu budi buntamba bukole ne budi bunkoka panshi mu ngenza. Nakashipa muananyi wa balume wa kumpala, nakadi mumane kukuatshika maluvu panakadi mumusuikile pa nyima ne panakadi mumane kukuatshika maluvu, nakadiela panshi mbunguluka ne nakasunsula mutu wa muananyi, muana wakafua. Nkuatshishe biwasua, nsungile ku lufu elu! Kuikala muena diabololo kakuakunkuatshisha. Diyila dia malu a Nzambi kadiakunkuatshisha. Nganyi walua kunsungila? Nganyi wampandisha?” Ngakitaba ne “Ditalala dikale kuudi, kolesha muoyo! Muudi ukenga emu mmudi bantu buonso bakenga. Mukanda wa Nzambi, udi witaba ku kudila kuebe, ne kunyingalala kudi mu mutshima webe mene. *Lomo 7:15-25*; udi utuambila mudi bubu pa mbidi petu, kadi udi utuambila kabidi bua Muntu udi mua kutusungila.” Bualu bua disua dia kuenza bimpe didi kundi, kadi bukole bua mua kuenza nabu bimpe kabuenaku. Bualu bua muanda muimpe undi musue kuenza, tshiena ngenza, kadi muanda mubi undi tshiyi musue kuenza, ngowu undi ngenza. Bubi budi munda muanyi budi bungenzeja bua meme kuenza bibi matuku onso ne malu mimpe andi mene mene musue kuenza, tshiena ngenza nansha. Ndi nsanka munda muanyi bua mikenji ya Nzambi, kadi ndi mmona mikenji mukuabo mu mubidi wanyi udi uluangana ne mukenji wa menje anyi, ne udi umbueja mu bupika bua mukenji wa bubu udi mubidi wanyi. Ku tótótó ne ku ndandanda muadi ewu neufike mu mutshima wa muntu yonso: “Meme muena makenga! Wansungila nganyi?” Bituadila kudi Nzambi Yeye neatuitabe, ne Neatusungile.

## DITABA


“*Ndi nsakidila Nzambi bua Yesu Kilisto Mukelenge wetu.*” *Lomo 7:25.*  
“*Bianupa muana budishikaminyi, nenuikale badishikamine bulelela*”  
*Yone 8:36.*

Yesu udi ditaba ku makonka etu onso. Ditaba ku dikonka diebe. Mu munga muntu yonso kamuena lupandu. *Bien. 4:12.* Anu Yesu nkayandi ngudi mua kutusungila ku bubu buetu. Anu mashi andi akamata pa mutshi mutshiamakane ngadi mua kutulengeja ku bubu buetu buonso. Kakuena munga, anyi muena mbu-

ku, anyi munga muntu, anyi muyishi wa Diyi dia Nzambi anyi muambi wa Nzambi, anyi Ekelezia udi mua kukusungila ku bubi nansha. Anu Yesu nkayandi, muana wa mukoko wa Nzambi udi umusha bubi bua ba pa buloba, Yeye ngudi mua kukusungila ne mashi Andi ne ku Bukole bua Nyuma wandi Muimpe.

Yesu, muana wa Nzambi wakalua pa buloba ebu bua kutabaja mesu a bafobo bua kupatula bena lukanu mu tshina tshia lukanu, ne bua kumusha badi mu midima mu nzubu wa lukanu. *Yeshaya 42:6, 7.* Yesu wakamba ne, Muntu yonso udi wenza bubi udi mu-

## TUASAKIDILA KUDI NZAMBI BUA YESU KILISTO



*Bianupa muana budishikaminyi, nenuikale badishikamine bulelela.*  
(Yone 8:36).

pika wa bubi; Kadi bianupa Muana (wa Nzambi) budishikaminyi, nenuikale badishikamine bulelela. *Yone 8:34, 36.* Yesu udi bulelela budi bupikula. Yesu Muana wa Nzambi wakangata bubi buetu buonso pambidi pandi ku mutshi mutshiamakane. Mibi yebe idi mipopela pa mutshi mutshiamakane. “Bulelela, wakatutuadila makenga etu, wakuambuila kanyinganyinga ketu; bakamukuma bua malu mabi etu. Dipila dia bubi bua buonso buetu dikadi pambidi pandi, ne tuakukoleshibua ku mimbundabunda yandi.” *Yeshaya 53:3-7.*

Balaba wakadi muntu mubi ne mushipiangananyi munyokibue bua kufua. Wakadi ne buakushipibua pa mutshi mutshiamakane,

kadi Yesu wakangata muaba wandi ne wakambula mutshi mutshiamakane wakadi ne bua Balaba kufuilapu. Yesu, Muana wa Nzambi wakashipibua pa mutshi mutshiamakane mu muaba wa Balaba, mu muaba webe ne mu muaba wanyi; mushipianganyi wakalekedibua bualu bua munga muntu wakafua pa lufu luandi. Wewe ne meme tudi Balaba. Difutu dia bubi ndufu, kadi dipa dia Nzambi, didi muoyo wa tshiendelele mu Kilisto Yesu. Biwatangila Mutshi Mutshiamakane mene mene ne ditabuja, neudimone wewe mene mene ne bubi buebe mbupopela pa Mutshi Mutshiamakane. Yesu wakangata muaba webe pa mutshi mutshiamakane bua wewe wikale ne muoyo tshiendelele. Wakamatshisha mashi andi bua dijimija dia bubi buebe. Bualu bua Nzambi wakatamba kusua ba pa buloba, yeye wakabapa Muandi umuepele mulela bua muntu yonso wamuitabuja kafu biandi, kadi ikale ne muoyo wa tshiendelele.

Pakumvua mukaji wa Mfumu meyi aa, wakitabuja Yesu mene mene ne wafila mutshima wandi ku Ewu wakafua pa Mutshi Mutshiamakane ne wakamatshisha Mashi andi mimpe bua kulengeja mutshima wandi ku bubi buonso. Wakafila mutshima wandi wa bubi kudi Nzambi, nunku Nzambi wakamupa mutshima mupia-mupia muuja tente ne Nyuma Wandu Muimpe. Kakamujimijila anu bubi nkayabu nansha, kadi wakamusungila kabidi ku bukole bua bubi; Kukabi bidimu bia bungi, mukaji ewu udi musombe biakane ne mutshima muimpe ne wa bukutu. Katu wanua kabidi maluvu nansha; katu wanua makanya nansha; udi muikale bimpe bualu bua udi mumonyi (ntemu) mene mene wa bualu bulelela, ujadika kabidi ne, “Bikala muntu mu Kilisto, yeye udi mufukibue mupia-mupia.” *II Kolinto 5:17.*

Wewe kabidi, mulunda mubadi, udi mua kuikala mudikadile mu ditabuja dia Yesu Kilisto. Musungidi Yesu wakamba ne; “Luayi kundi, buonso badi ne mudimu mukole, badi ne bujitu bunene, meme nenupe dikisha.” Lua kudi Yesu bu muudi, nansha kunyi kuudi. Muleje makenga ebe onso. Kena mua kukuipata nansha biwikala udi usemena kudiye ne mutshima mupuekele, kadi muikale ne ditabuja. Misangu mikuabo udi mua kuikala muena kuitabuja wa kale kadi muikale musuika kudi bubi. Lua kudi Yesu, Neakupikule katataka, bu muakondapaye muena nsudi ne mufofo. Yesu nkayandi ngudi mua kuondapa muoyo munyingalale ne kupikula udi mukuatshibue. “Udi ukubuikidila malu mabi ebe onso; udi ujikija mabedi ebe onso.” *Misambu 103:3.*

Pawafila mutshima webe kudi Yesu, ambila kabidi bakuabo bua Ewu udi mukusungile. Tuetu kabidi tudi tusanka bua kumvua ngumu yebe.

---

**E-MAIL: [info@angp.co.za](mailto:info@angp.co.za)**

**ALL NATIONS GOSPEL PUBLISHERS**

**P.O. BOX 2191, PRETORIA, 0001, R.S.A.**

(Une Mission de Littérature évangélique financée de dons)

(Reg. No. 1961/001798/08)